
FRSB UPM lancar Sambutan Ulang Tahun Ke-30, raikan legasi idea dan sumbangan warga fakulti



Oleh: Noor Eszereen Juferi

SERDANG, 15 Jan – Fakulti Rekabentuk dan Senibina (FRSB), Universiti Putra Malaysia (UPM) semalam melancarkan Sambutan Ulang Tahun Ke-30 yang menampilkan lapan program istimewa berteraskan penghayatan sejarah, pengukuhan jaringan serta pemerkasaan kreativiti dalam bidang alam bina.

Timbalan Naib Canselor (Jaringan Industri dan Masyarakat), UPM, Profesor Ir. Dr. B.T. Hang Tuah Baharudin, berkata sambutan ini bukan sekadar menandakan pencapaian usia, malah menjadi wadah meraikan legasi idea, nilai dan sumbangan warga fakulti yang telah membentuk FRSB sebagai sebuah fakulti berwibawa di peringkat nasional dan antarabangsa.



“Perjalanan tiga dekad FRSB mencerminkan keupayaan fakulti tersebut melahirkan graduan berdaya saing serta menyumbang secara signifikan kepada pembangunan industri, masyarakat dan landskap alam bina negara,” katanya.

Sambutan berkenaan bertemakan “Imbauan Masa Lalu, Raikan Masa Kini, Membentuk Masa Depan”, dengan slogan “TEMAN: 30 Tahun FRSB” diperkenalkan sebagai simbol kebersamaan, sokongan dan semangat kekeluargaan dalam kalangan warga fakulti, alumni dan rakan strategik.

Dekan FRSB UPM, Profesor Gs. Dr. Mohd Johari Mohd Yusof berkata, FRSB berhasrat untuk terus memainkan peranan strategik dalam memacu agenda universiti serta menyumbang kepada pembangunan inovasi rekabentuk dan alam bina yang beretika serta lestari.

“FRSB telah berkembang daripada sebuah benih idea kepada pohon ilmu yang kukuh dan berdaya tahan, serta menjadi nadi penting dalam pembangunan seni bina, seni bina landskap dan rekabentuk perindustrian negara,” katanya.



Selain itu, lapan program istimewa yang dirancang akan meraikan perjalanan 30 tahun FRSB yang sarat dengan pengalaman berinspirasi, kenangan bermakna serta pencapaian cemerlang.

Kemuncak sambutan akan berlangsung pada 26 Jun 2026, bertepatan dengan tarikh penubuhan rasmi FRSB pada 26 Jun 1996.

Majlis pelancaran turut disertai dengan tayangan montaj video yang memaparkan peranan aktif FRSB dalam melahirkan graduan berkeupayaan mengaplikasikan ilmu rekabentuk, seni bina dan seni bina landskap dalam konteks sebenar industri dan masyarakat.

Dalam pada itu, penubuhan FRSB, UPM bermula daripada idea awal seawal tahun 1976 menerusi cadangan penubuhan Fakulti Hortikultur dan Seni Bina Landskap, sebelum usaha tersebut diperkukuh pada awal 1990-an dan akhirnya berkembang sebagai fakulti yang memayungi bidang seni bina, seni bina landskap dan rekabentuk perindustrian.

